

**Namminersorlutik Oqartussat kommunillu Danmarkimi nunanilu allani
kiffartuussinernut atatillugu aningaasartuutigisartagaasa Naalakkersuisut UKA 2017-
mut misissuinermik saqqummiussinissamik suliniuteqaqqullugit inatsisartut
aalajangiiffigisassaattut siunnersuut. Misissuinermi aamma innersuussutit qanoq ililluni
nunatsinni kiffartuussinerit atorluarneqarnerusinnaanerat, taamaalilluni nunatta
avataaniit kiffartuussinerit annikillisarnissaat anguneqaqqullugu.
(Inatsisartunut ilaasortaq Anthon Frederiksen, Partii Naleraq).**

pillugu

**Aningaasaqarnermut Akileraartarnermullu Ataatsimiititaliap
siunnersuutip aappassaaneerneqarneranut**

ISUMALIUTISSIISSUTAA

Ataatsimiititaliap suliarinninnermini inuttarai:

Inatsisartunut ilaasortaq Jens Immanuelson, Siumut, siulittaasoq
Inatsisartunut ilaasortaq Sara Olsvig, Inuit Ataqatigiit, siulittaasup tullia
Inatsisartunut ilaasortaq Steen Lyng, Atassut,
Inatsisartunut ilaasortaq Jess Svane, Siumut
Inatsisartunut ilaasortaq Tillie Martinussen, Demokratit
Inatsisartunut ilaasortaq Peter Olsen, Inuit Ataqatigiit
Inatsisartunut ilaasortaq Aqqaluaq B. Egede, Inuit Ataqatigiit

Ulloq 2. maj 2016-imi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Siunnersuuteqartoq isumaqarpoq nunatsinni aningaasat kaaviiarnerat, tassungalu ilanngullugu nunatta avammut niuernerani isertitat aningaasartuutillu erseqqinnerusumik misissuiffigineqartariaqartut. Taamaattumillu Namminersorlutik Oqartussat sullississutitut aningaasanik atuinerannik erseqqissumik misissuinissap suliniutigineqarnissaa siunnersuuteqartumit kissaatigineqarpoq. Sullississutit nunatsinneersut qanoq annertunerusumik pisiarineqartalersinnaanerannik kaammattuutit misissueqqissaarneq ilaqartinneqassasoq siunnersuuteqartup aamma kissaatigaa.

Siunnersuutip Inatsisartunit siullermeerneqarnera

Inatsisartuni amerlanerussuteqarluartut Siumut, Inuit Ataqtigiit aamma Patii Naleraq siunnersuummut tapersiippat. Demokraatit Atassullu Naalakkersuisut allannguutissatut siunnersuutaat una taperserpaat:

Neqeroortitsisarnermut pisiortortarnermullu kaajallaasitat nutaat nalilersorneqarnissaannik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut, tassa taamatut nalilersuinissamut naammaginatumik misilittagaqalertoqarpat. Naliliineq tigussaasumik inassuteqaatitalik Inatsisartunut agguanneqassaaq.

Pisiortortarneq pillugu kaajallaasitap 24. september 2010-meersup maanna atuuttup nutarternerata aallartinneqarenera Naalakkersuisut allannguutissatut siunnersuummut tunngavilersuutigaa. Naalakkersuisut ilaatigut paasissutissiissutigaa siunnersuutigineqartoq assigalugu Namminersorlutik Oqartussat sullississutinik, tassungalu ilanngullugu Danmarkimi nunanilu allani sullississutinik pisisarnerat misissoqqissaarneqartussaareersoq.

Ataatsimiititaliap siunnersuummik suliarinninnera

Siunnersuutip matuma Naalakkersuisullu allannguutissatut siunnersuutaata assigiinngissutigaa siunnersuuteqartumit sammeneqarmata Namminersorlutik Oqartussat kommunillu sullississutit pisiarisartagaat, Naalakkersuisulli allannguutissatut siunnersuutaanni Namminersorlutik Oqartussat kaajallaasitaat nalinginnaasumik sammeneqarluni.

Tamatuma peqatigisaanik maluginiarneqassaaq misissueqqissaarnerup kissaatigineqartup UKA 2017-imi saqqummiunneqarnissaanik siunnersuuteqartup kissaataa, tamatumani Naalakkersuisunit siunnersuutigineqarluni taama naliliinissamut misilittakkat naammattut pissarsiarineqarsimalerpata misissueqqissaarnissamik siunnersuutertik ingerlanneqassasoq.

Naalakkersuisut allannguutissatut siunnersuuteqarneranni anguniakkat siunnersuummit matumingga mattunneqanngitsut ataatsimiititaliaq maannangaaq isumaqarpoq. Siunnersuut una pillugu Inatsisartut isumaqtigiinniarnarat qanorluunniit inerneqaraluarpat neqeroortitsisarnermut pisiortortarnermullu kaajallaasitassat Naalakkersuisunit nutarterlugit aallartinneqartut nalilersornissaat Naalakkersuisut namminneq ingerlatassaraat.

Siunnersuutip aningaasaqarnikkut kingunerisassai

Siunnersuummi oqaatigineqartut saniatigut allatut naliliinissaminut ataatsimiititaliaq tunngavissaqarsorinngilaq.

6. Ataatsimiititaliap inassuteqaataa


Tamanna tunngavigalugu siunnersuut Inatsisartunit akuerineqassasoq **Aningaasaqarnermut Akileraartarnermullu Ataatsimiititaliami amerlanerussuteqartut Siumup Inuit Ataqtigiillu ilaasortaataa inassutigaa.**

Aningaasaqarnermut Akileraartarnermullu Ataatsimiititaliami ikinnerussuteqartut Demokraatit ilaasortaataata ima ikinnerussuteqarlutik oqaaseqaateqassapput:

Naalakkersuisut allannguutissatut siunnersuutaat Demokratinit tapersemaqarpoq.

Tamanna tunngavigalugu **Aningaasaqarnermut Akileraartarnermullu Ataatsimiititaliami ikinnerussuteqartut Demokraatit Atassutillu ilaasortaataataasa siunnersuut itigartinneqassasoq inassutigaa.**

Taama oqaaseqarluni isumaliutissiissummilu allassimasutut paasinnilluni ataatsimiititaliap siunnersuut aappassaaniigassanngortippaa.




Jens Immanuel, siulittaasoq




Aqqaq B. Egede, siulittaasup tullia



Jess Svane



Steen Lynge



Tillie Martinussen



Peter Olsen



Sara Olsvig